

--	--	--	--	--	--	--	--	--	--

民為貴 一章

艾南英

極論民之所為貴。而君之所以待民者。可思已。夫君與社稷。至不能與民比重。而顧可輕其民哉。且夫天之為夫民也。必使出類之才。首而君長之。而後承以諸侯大夫師長。以宣其力。又為之壇壝。社稷。春祈秋報。以求其相於冥漠之表。然則民之與社稷與君。其輕重何如哉。吾謂民為貴。而社稷次之。君為輕。原夫生民之初。不能自君長也。必有德之大者。而後百里之民從而聽命焉。

於是有諸侯之國。合諸侯之國。又不能自君長也。又就其德之愈大者。而後四海之民從而聽命焉。於是乎為天子。是得乎丘民而為天子也。然既為天子矣。天子必建國。諸侯必立家。大為侯。甸。藩。衛。小為亞。圉。陪。隸。於是。有得乎天子而為諸侯。得乎諸侯而為大夫者。然皆不若得乎丘民者。而遂為天子。雖然。猶未足以見民之貴也。彼得乎天子而為諸侯矣。上憑天子之威。而下有大夫之奉。然上則天子有大司馬九伐之權。而下則大夫

有貴戚卿易位之柄。為其失民心而危社稷也。然則為社稷而變置諸侯。豈為社稷哉。為失民而已矣。何也。彼社稷者。尚未能免夫此也。社稷貴為上。公尊比諸侯。而所司者。水旱凶荒之事。則既有分藩之職。所享者。犧牲粢盛之薦。則又有侯國之奉。使斯民之責。獨重繩諸侯。而輕繩社稷。則非天為民而立。天子使之百神受職。而祭祀以馭其黜陟之意。故旱乾水溢。則變置社稷。所謂年不順成。八蜡不通。而伐鼓於社。朱絲膺之。皆有責譴

之義明乎社稷不能為民捍災禦患則不能無功而坐食其報况於諸侯之失民心乎雖然言諸侯社稷而不及天子何也民心既散諸侯皆叛天子將無與立而忍言之者所以尊天王大一統也然而羣臣至於南郊稱天而誅之則亦變置之微權也

步步為營其中賓主輕重次第曲折起伏回旋古義法無一不備五家中人皆謂艾之天分有限然此種清古之文風味猶勝於黃陳則讀書多用功深

之效。